

Mungz Genfungh: Yunggh Gij Vah Vunz Dangdieg Ceiq Sug Cienz Gij Sing'yaem Fapceih

□ Liengz Cingz raiz Dahdingz hoiz

De dwg boux fucwz aen dingz daih'it saemjbueng minzsaeh Ningzmingz Yen Yinzminz Fazyen, de heuh Mungz Genfungh. Youq ndaw da lingdauj, de dwg boux fazgvanh rox song cungj vah maenhndei naengzlig ak, yezvu suiyingz sang, najdoi q gij anqgienth ngeiznanz gig miz sim dangrap ndeu; youq ndaw da doengzsah, de dwg "boux fazgvanh rox lai" gawq rox yungh Vahcuengh, Begvah dangdieg, Vahbujdungh banh'anq, dinfwngz youh soem, rox ciengq rox diuq rox yienjgangj rox gaemguen; youq ndaw da boudangsah, de dwg "boux fazgvanh rox sim" gig hawj vunz nyienh caengaenh, nyienh baedauq, gig rox diuzgaij ngaekngeu ndeu. Mboengqneix, gicej bae daengz Ningzmingz Yen Yinzminz Fazyen, byaijhaeu ndaw hong Mungz Genfungh ngoenznaengz, roxnyinh boux fazgvanh yenzngeng caengz lajdaj neix baenzlawz yungh song cungj vah cienz gij sing'yaem fapceih.

Yienhciegz yungh song cungj vah guh fazdingz saemjleix: Henhoh gij gienzleih gunghminz gak minzczun yungh gij vah minzczun bonjfaenh dajgauq

Ndwen 8 ngoenz 5 banhaet, gicej daeujaengz aen dingz saemjbueng Ningzmingz Yen Yinzminz Fazyen, naengh dingq yungh song cungj vah guh fazdingz saemjleix.

Mungz Genfungh heuh boux fazgvanh culij caeuq suhgyienz doxcaez hai hoih caepcawq haidingz, genjdanh yenzgiu doxyaeng gij cingz-gvang anqgienth caeuq gij saehhangh youq ndaw gocwngz haidingz aeu louzsim. Aenvih bouxgauq, boudenggauq cungj dwg vunz lajmbanj Bouxcuengh, mbouj rox gangj Vahgun geijlai. Fazdingz saemjleix gaxgonq, fazdingz cam gij yigen song mbiengj, song mbiengj cungj bauq yungh gij vah minzczun bonjfaenh camgya fazdingz saemjleix.

Mungz Genfungh vuenh hwnj buh fazgvanh, byaij haeu fazdingz, yungh Vahgun caeuq Vahcuengh senhbu aen anqgienth baizcawz fuengzngaih cengnauh neix haidingz. Bouxgauq dwg dingz vunzmbanj aen cunhminz sui-cuj Ningzmingz Yen Mingzyangh Cin Fung'vangz Cunh Mbanjcaimeij, gyoengqde youq dieg "dihbai" mbanj bonjfaenh hwnq miz ranzyouq, youq ndawgyang ranz caeuq ranz louz miz diuz roen vunzmbanj ngoenznaengz baedauq baihnanz gvangq 2.8 mij, baihbaek gvangq 3.8 mij ndeu. Bi 2016, boudenggauq Couh moux yungh aen leixyouz diuz roen neix dwg de yungh reihnaz bonjfaenh vuenh daeuq guh, gonqlaeng yungh gik gaeuq gik vaih, dohlahgih daeuq laengz diuz roen neix, gazngaih vunzmbanj ngoenznaengz baedauq yinxhwnj cengnauh. Vihneix, ginggvaq lenzse, cunhvejveij caeuq yinzminz cwngfuj lai baez baij vunz daeuq diuzgaij

cawqleix, hoeng aenvih boudenggauq genhciz gij yigen bonjfaenh diuzgaij mbouj miz yungh, bouxgauq couh bae fazyen daezok dajgauq.

Youq mwh fazdingz saemjleix, Mungz Genfungh gangj ndaej cenghseuq, Vahcuengh Vahgun doxvuenh yungh, gangj ndaej mbouj vaiq mbouj menh, cam vunz genjdanh mingzbej, yungh gij gi'gyauj saemjbueng gvenqsug caeuq Vahcuengh bonjdieg raeuzled gaemguen daengx aen hozdung fazdingz saemjleix, hawj boughloh fazdingz saemjleix cwngzsw faenmingz, youh gveihfan youh miz yauqlwd dangqmaz.

Soengq bouxgauq, boudenggauq bae liux le, Mungz Genfungh lwnh gicej, fapguek caeuq faplwd guek raeuz gvidingh, gunghminz gak minzczun cungj miz gij gienzleih yungh gij vah gij saw minzczun bonjfaenh dajgauq. "Gawqyienz faplwd hawj boudangsah minzczun vunznoix miz loh gienzleih neix, raeuz couh aeu roengzrengz bae henhoh. Yienznaeu yungh song cungj vah banh'anq yaek gyalai gij hong fazgvanh, gij seizgan haidingz, doiq vah caeuq yezvu naengzlig fazgvanh hix miz iugouz engq sang, hoeng de dwg gij hongdawz daejyienh swfhaz goengbingz cingngeih, gig miz yauqlwd bae siucawz gij cengnauh ngaekngeu ndawgyang boudangsah minzczun vunznoix itdingh aeu miz."

Diuzroen yungh song cungj vah banh'anq: Guh "boux fazgvanh rox sim" vunzlai minzczun vunznoix

Dungzmenz Yinzminz Fazdingz liz yienhsingz Ningzmingz 101 goengleix, guen baez daih'it saemjleix gij anqgienth minzsaeh ndaw Dungzmenz Cin, Naznanz Yang song aen yanghcin neix, diegguenj daihgaiq miz 6.6 fanh vunz, dingzlai vunz cungj gangj Vahcuengh. Dungzmenz Cin dwg mbanjranz Mungz Genfungh, de youq Dungzmenz Cin majhung, ndigah gig sug Vahcuengh dangdieg. "Vunz dangdieg cungj dwg vunz minzczun vunznoix, dingzlai vunz dwg gangj Vahcuengh, gij vunzgeq mbouj rox gangj Vahbujdungh, yungh Vahcuengh dangdieg diuzgaij mauzdun, caeuq boudangsah lumj gangjgoj nei gangjavah, hawj gou caeuq vunzlai liz gyawj lo, dingzlai cengnauh cungj diuzgaij ndaej gig ndei, ndigah youq Dungzmenz Yinzminz Fazdingz, gou itcig yungh song cungj vah guhhong." Mungz Genfungh doiq gicej naeu.

Mwh youq Haijyenh Yinzminz Fazdingz guhhong, Mungz Genfungh yungh Vahcuengh diuzgaij ndei aen anqgienth cengnauh lizvwnh ndeu. Youq ndaw gocwngz diuzgaij aen anqgienth neix, Mungz Genfungh raen boudangsah song mbiengj lij miz gamjcingz, caiqlij cungj gig gvansim dah lwg'iq, yienghneix de yungh faplwd caeuq cingzgamj dox giethab



▲Mungz Genfungh bae mbanj senhconz hong fapceih.

bae diuzgaij. De daiqlingx aen doih yungh Vahcuengh saemjbueng bonjfaenh, daiq hwnj gozveih, sezbei, aeu aen fazdingz yungh Vahcuengh okcunz saemjleix hai bae daengz ndaw ranz boudangsah, caemhcai q gig rox cauhoq bae iucing boux daiyauj cunhvej cujyin, funij cujyin, beixnuengx song mbiengj daeu yienhciegz caeuqfaenh diuzgaij. Youq gwnz aen fazdingz okcunz saemjleix depgaenh ndwenngoenz neix, boux dem boux vunz mbanjranz simgyaez, coenz dem coenz vah mbanjranz raeuj sim, doeklaeng hawj song gyanbaz oi q neix doxndei dauq, yienhciegz diuzgaij raeujrub hawj vunz gamjdoengh dangqmaz.

Mungz Genfungh lwnh gicej, yungh vah dangdieg guh diuzgaij, hawj vunz maij caengaenh, maij haeu gyawj, vunzlai haemq haengj, vunzlai gangjok iugouz, guh dajgauq cungj engq doengswnh, guh gij hong banh'anq hix engq swnhleih lo.

Lai bi daeuq, Mungz Genfungh geiqmaenh aen cunghcij cienzsimeienziq fugsah yinzminz, cungj dwg guh daengz giendingh mbouj cuengqsoeng, yienjok gij cwzyin boux fazgvanh ndeu, aeu gij guhfap hengzdoengh goengcingq swfhaz, fwngz seuq guhhong, youq gwnz diuzroen youh hung youh ronghsag fugsah daengxbueng, vih yinzminz swfhaz mboujduenh baenaj. Geij bi neix daeuq, Mungz Genfungh moix bi bingzyaenz banh'anq 80 lai aen, gij beijlwd gietanq moix bi dabdaengz 80% doxhwnj. Aenvih hong guh ndaej gig ndei, de ndaej bingz baenz "sam lingz biubing" daengx si fazyen bi 2014 gvaq, bi 2015 ndaej bouxvunz senhcin fazyen daengx gih, lienzdaemh geij bi ndaej bouxvunz senhcin gij cwnghauh miznaj aen fazyen de youq haenx.

Ningzmingz Yen Yinzminz Fazyen: Yungh gij vah minzczun cienz gij sing'yaem fapceih

Ningzmingz Yen dwg dieg

minzczun vunznoix henzguek, daengx yienh miz 44 fanh vunz, ndawde Bouxcuengh ciemq 82.9%. Ningzmingz Yen Yinzminz Fazyen dangcuj cwngzienz, fuyencangj Cwng Daujginz lwnh gicej, geij bi neix daeuq, Ningzmingz Yen Yinzminz Fazyen gaenxmaenx guh gij saemjbueng yungh Vahcuengh Vahgun song cungj vah neix, cungfaen baujvang vunzlai yungh gij vah minzczun bonjfaenh dajgauq. Cungdenj hopheux minzczun doxgiet hwngfat, dajcauh gij binjbaiz fugsah yungh Vahcuengh Vahgun song cungj vah dajgauq, daezswng gij suiyingz fugsah yungh song cungj vah dajgauq, baujmaenh gij muzbyauh swfhaz vih yinzminz, goengcingq swfhaz, youq ndaw saemjbueng gaeuqgeq yinxhaeu yenzsu Vahcuengh, guh yungh Vahcuengh Vahgun song cungj vah dazyinx dajgauq, diuzgaij, fazdingz saemjleix, dauqcunz doenghgi neix, caemhcai q guh baenzroix gij hong yungh Vahcuengh okcunz saemjbueng caeuq swfhaz fugsah miz daegsaek, siucawz gij gazngaih gangjavah bae, coicaenh siucawz mauzdun cengnauh, aeundaer faplwd yauqgoj caeuq sevei yauqgoj ndei, hix ndaej daengz fazyen gaep baihgwnz haengjdingh caeuq sevei gak gyaiq gvangqlangh danqhaenh.

Dangqnaj, Ningzmingz Yen Yinzminz Fazyen gij ganbu caeuq gingcaz rox gangj Vahcuengh Vahgun song cungj vah neix gungh miz 68 vunz, ndawde fazgvanh yenzngeng 22 vunz, gij vunz bang swfhaz 46 vunz. Bi 2018, miz 4 boux fazgvanh yenzngeng ndaej bingzdingh baenz fazgvanh Cuengh Gun song cungj vah. "Maqmuengh gyoengq fazgvanh song cungj vah aeu Mungz Genfungh guh daiyauj haenx gaenxmaenx fazveih gij ndei vah minzczun, vih beixnuengx Bouxcuengh daezhawj gij fugsah swfhaz engq ndei, coicaenh minzczun doxgiet huzndei." Ningzmingz Yen Yinzminz Fazyen dangcuj cwngzienz, fuyencangj Cwng Daujginz naeu.